

27. september 2022

**Uunga siunnersuut: Mittarfeqarfiit A/S pillugu Inatsisartut inatsisaat**

(Ineqarnermut Attaveqaasersuutinullu Naalakkersuisoq)

Ukiorpassuarni aaqqissuussaaneq taama isikkoqartoq ingerlassimasarput nutartissallugu piffissanngorpoq, mittarfeqarfinniinnaangitsoq kisianni aamma allani, assersuutigalugu qiviarneqarsinnaasut ilagivaat suliffeqarfiutitta siulersuisui aningaasarpaalusuarnik atuiffigisartakkagut. Siumumi isumaqarpugut aaqqissuusnaanitsinnik isumatusaarluta aaqqissuusseqqittariaqartugut.

Mittarfeqarfinnik ingerlatsineq oqitsuinnaangitsoq tamatta ilisimavarput, tassami unammilligassarpassuaqarpugut 1 milliard kr. sinnerlugit aserfallatsaaliinermut aningaasanik pisariaqartitsivugut Siumumiillu nuannaarutigaarput allangortitsinikkut iliuseqarfigineqarnissaat maanna Naalakkersuisut siunertarimmassuk. Mittarfippassuit heliportillu qiviraanni annertunerpaatigut amigartooruteqarfiupput soorluttaaq kujataani mittarfissaq taamatut siulittuutigineqartoq. Sunali tamarmi taartuinnaangilaq tassami naatsorsuutigineqarpoq Ilulissat Nuullu siunissami annertunerusumik sinneqartooruteqarfiussasut. Tamannali naammangilaq, aaqqissuussaanerput qiviaqqittariaqarparput aningaasanillu sipaaruteqarluta, taamaaliortariaqarpugut angallanneq akisoreersoq sulii annerusumik eqqorneqaqqunagu, tamatumunnga tunngatillugu Naalakkersuisut tapiissuteqartarnissaq politikkikkullu sulii nakkutiginneqqissaarnissaq siunertarimmassuk iluarisimaarparput.

Pisortat ingerlatsiviini ammasumik periuseqarnissaq qulakkeerniarlugu, allagaatinik takunnissinnaatitaaneq pillugu inatsit aalajangersakkallu tassunga attuumassutillit ersarissarneqartariaqartut isumaqarpugut. Taamaalilluta tamatta periarfissinneqassaagut ilisimalissallugu, pisortat siunnersuusiorminni suna siunertarlugu suliaqarsimanersut, aamma ulluinnarni ingerlatsinermi aningaasartuutit uatsinnut toqqaanaq sunniuteqartartut qanoq inissisimatinneqarnersut. Minnerunngitsumik, pingaarnertullu,



atorfimmut atatillugu ileqqorlussinnaanerit pinngitsoortinniarnissaanut inuiaqatigiittut sakkussaqaqnerulernissarput siunertaralugu.

Mittarfeqarfiit eqqartorneqartillugit siunissaq nalunartulik nalornissutaajunnaarlugu inuiaqatigiinnut kommuninullu ersarissumik naammassinissaa erininarpoq, Siumumiit isumalluarpugut illersornissamut isumaqatigiissutip naammassinissaanut taamaalilluni mittarfiit ilaasa matuneqaratik ingerlaannarnissaat qulakkeerneqassammat. Siumumiittaaq Amerikarmiut soqutiginninnerat maluginiakkatta ilagivaat, taamaattumik Inatsisartut peqataatillugit siunissamut ilusiliinissaq pingaartilluinnarparput.

Siunissaq pissanganartoq ornipparput, allanngorneq annertoq taamaattumik tupinnangilluinnarpoq peqqissaartumik sulerusunnerput. Taamaakkaluartoq Siumumi isumalluarpugut ukiunimi tulliuttuni periarfissarpassuit ammaanqartussaapput tamakkuali tamarmik akilersinnaasumik ingerlassappata kommunit suleqatigalugit suli suliassarpassuaqarpugut.

Siunnersuutip qiterpiaa tassaasoq, mittarfiit 13-iusut, qulimiguulinnullu mittarfiit 46-sut aktianik piginneqatigiiffimmuut nutaami ingerlanneqalernissaat annertuumik sipaarutaasussammat Siumumiik iluarisimaarparput, taamatullu oqaaseqarluta siunnersuut taamatut isikkoqartillugu aappassaaniigassanngortipparput.

Doris J. Jensen, Siumut